

दिनांक 03.11.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रदेशभर मांय भाईदूज रो तिवांर पारम्परिक उच्छाव रे सागे मनायो जा रह्यो है।
- प्रधानमंत्री नरेंद्र मोदी कह्या —टीबी रोग रा मामलां मांय कमी भारत रा समर्पित अर अभिनव कोशिश रो नतीजो।
- मेजर मिनरल ब्लॉक्स री नीलामी मांय प्रदेश, देशभर मांय कीर्तिमान बणयो—अक्टूबर महीना ताई ई—पोर्टल रे जरिये 32 मेजर मिनरल ब्लॉक री सफल नीलामी व्ही।
- राज्य मांय बत्ती ठौड़ां माथे रात रा तापमान मांय गिरावट—दिन मांय गर्मी रो असर बरकरार।

000

भाईदूज रा तिवांर आज परम्परागत उच्छाव रे सागे मनायो जा रह्यो है। कार्तिक मास रा शुक्ल पक्ष री दूज ने यो तिवांर मनायो जावे है। ईण दिन बहनां भाई रे टिको कर उण री लम्बी उम्र अर खुशहाली री कामना करे है। केई ठौड़ां माथे इण मौके बहनां आप रा भाई रे रक्षा सूत्र बांधे हैं। दीवाळी रे दो दिन पाछे मनाया जाबा वाळां इण तिवांर रे सागे ई दीपोत्सव पूरो व्हे जावे है। प्रधानमंत्री नरेन्द्र मोदी भाई दूज रे मौके देशवासियां ने शुभकामनावां दी है। सोशल मीडिया पोस्ट मांय वणा आस जतायी के ओ तिवांर भाई अर बहनां रे बीच विश्वास ने पक्को करे है। मुख्यमंत्री भजनलाल शर्मा भी भाई—बहन रा प्रेम अर विश्वास रो प्रतीक ईण तिवांर माथे प्रदेश वासियां ने शुभकामनावां दी। प्रदेश मांय भी भाईदूज उच्छाव रे सागे मनायी जा री है। बांसवाड़ा, झालावाड़, पाली, टोंक, दौसा अर जयपुर समेत दूजी ठौड़ां माथे भाई दूज रे मौके घणो उच्छाव देख्यो ग्यो है। वठिने, भीलवाड़ा जिला रा मांडल कस्बा मांय काल गोवर्धन पूजा माथे गाय बैलां री विधि विधान सागे पूजा करी गयी। ईण मौके गर्धभ पूजन भी व्ह्यो। वठिने जैसलमेर जिला मांय भी भाई दूज रो तिवांर धूम—धाम सूं मनायो जा रह्यो है। सोनार दुर्ग रा आराध्य देव लक्ष्मीनाथजी रा मिंदर मांय आज बडी संख्या मांय सिरधालू भगवान रा दर्शन कर्या।

000

त्यौहारी छुट्टियां री बजह सूं स्वर्ण नगरी जैसलमेर मांय सैलाणियां रो पूगणो जारी है। आं दिनां अठे बत्ती संख्या मांय देशी—विदेश सैलाणी पूग रह्या है। वठिने एक दिसंबर सूं जयपुर सूं जैसलमेर रे बीच हवाई सेवां सरू व्हे री है। आं उड़ान सेवा रोजाना मुह्या रैवेला। ध्यानजोग है के एक अक्टूबर सूं जैसलमेर सूं दिल्ली अर मुंबई रे बीच हवाई सेवां सरू होबा सूं सैलाणियां री संख्या मांय ईजाफो देख्यो जा रह्यो है। वठिने पोकरण मांय व्ही सैलाणी पूग रह्या है। वठिने उदयपुर मांय बत्ती तादाद मांय सैलाणियां रे पूगबा सूं पर्यटन सूं जुड्या व्यापारी खुश है बत्ती जाणकारी म्हाणा खबरनवीस ऊं—

000

उत्तराखंड रा विश्व प्रसिद्ध ग्यारहवां ज्योतिर्लिंग **श्री केदारनाथ धाम** अर यमुनोत्री धाम रा कपाट आज भैया दूज रा तिवांर माथे वैदिक मंत्रां रे सागे विधि—विधान रे मुजब शीतकाल खातर बंद कर्या गया है। ईण मौके केदारनाथ मांय 15 हजार सूं बत्ता सिरधालू मौजूद रह्या। ईण यात्रा काल मांय रिकार्ड साढ़े 16 लाख सूं बत्ता तीर्थयात्री केदारनाथ धाम री यात्रा करी। कपाट बंदी रे वास्ते मिंदर ने दीवाळी माथे करीब 10 किंवटल फूलां सूं सजायो गये हो। कपाट बंद होबा रे साथे ई बाबा केदार री पंचमुखी उत्सव डोली हजारू सिरधालूआं री मौजूदगी मांय आप रा शीतकालीन गद्दीस्थल **ओंकारेश्वर मंदिर ऊखीमठ** खातर

रवाना व्ही। पंचमुखी डोली आज आप रा पैला पड़ाव रे दौरान रामपुर पूगेला जद के 4 नवंबर ने श्री विश्वनाथ मंदिर अर गुप्तकाशी, 5 नवंबर ने डोली शीतकालीन गद्दीस्थल **श्री ओंकारेश्वर मंदिर ऊखीमठ** पूगेला। शीतकाल मांय बाबा केदार री पूजा ओंकारेश्वर मंदिर ऊखीमठ मांय व्हेला।

000

हनुमानगढ़ जिला मांय पूर्वांचलवासियां रा तिवार छठ पूजा री तैयारियां करी जा री है। सार्वजनिक छठ प्रबन्ध समिति री कानी सूं राख्या छठ महापर्व रे मौके श्रीगंगनहर रा छठ घाट माथे विधि-विधान सूं पूजा अर्चना करी गयी। इण रे पछे जनतां रा नुमाइन्दा री मौजूदगी मांय प्रचार रथ रवाना कर्यो ग्यो। समिति रा पदाधिकारी बतायां के छठ आयोजन रे तैत काल हाउसिंग बोर्ड री शिव कुटिया सूं शोभायात्रा काडी जावेला। 6 नवम्बर री सिंज्या छठ पर्व माथे सूर्य ने अर्घ दियो जावेला। दूजा दिन उगता व्ह्या सूर्य ने अर्घ देबा रे सागे महोत्सव पूरो व्हे जावेला।

000

प्रधानमंत्री नरेंद्र मोदी आज कहुया के टी.बी. रा मामलां मांय कमी भारत रा समर्पित अर अभिनव कोशिशों रो नतीजो है। देश री प्रगति री सराहवणा करता थकां श्री मोदी सोशल मीडिया पोस्ट मांय कहुया के सामूहिक भावना रे जरिये सरकार टीबी मुक्त भारत री दिशा मांय काम करती रहवेला। वे कहुया के सरकार टीबी मुक्त भारत बणावा खातर कमर कस राखी है। विश्व स्वास्थ्य संगठन रे मुजब भारत मांय 2015 सूं 2023 ताई टीबी रा मामला मांय 17 दशमलव 7 फीसदी री कमी दर्ज करी गयी है। या दर वैश्विक गिरावट 8 दशमलव 3 फीसदी सूं दूगनी सूं भी बत्ती है। काल सोशल मीडिया पोस्ट मांय जाणकारी साझा करता थकां स्वास्थ्य मंत्री जेपी नड्डा इण बात माथे जोर दिया के टीबी री रोकथाम खातर भारत रा बदळता दृष्टिकोण ने दरसावे है।

वणा बतायां के सरकार टीबी रोगियां ने जरूरी पोषण सहायता देबा खातर **नि-क्षय पोषण योजना** जेडी खास पहल कर र **राष्ट्रीय टीबी उन्मूलन कार्यक्रम** फैलायो अर मजबूत कर्यो है।

000

प्रदेश मांय मेजर मिनरल ब्लॉक्स री नीलामी देशभर मांय नुवां कीर्तिमान हासिल कर्यो है। राजस्थान रा माइंस अर भूविज्ञान महकमो इण माली बरस मांय अक्टूबर म्हीना ताई ई-पोर्टल रे जरिये 32 मेजर मिनरल ब्लॉक री सफल नीलामी करी है। खान अर पेट्रोलियम महकमां रा प्रमुख शासन सचिव टी. रविकान्त बताया के मुख्यमंत्री भजनलाल शर्मा री अगुवाई मांय अवैध खनन माथे **जीरो टॉलरेंस** री नीति रही है अर वैध खनन ने बढ़ावो देबा खातर योजनाबद्ध तरीका ऊं **मेजर मिनरल ब्लॉक्स** तैयार कर साफगोई तरीकां ऊं भारत सरकार रा ई-पोर्टल रे जरिये ई-नीलामी माथे जोर रह्यो है। राजस्थान मांय पैली बगत दो सोने री खान मांय सूं एक री **माइनिंग लीज** अर एक की कंपोजिट लाइसेंस खातर नीलामी व्ही है। बताया जावे है के नया प्रावधानां रे पछे देश भर मांय अब हाल ताई 4 सौ 19 **मेजर मिनरल ब्लॉक** री नीलामी व्ही है। जिण मांय सूं राजस्थान मांय सब ऊं बत्ता 86 मेजर मिनरल ब्लाकां री नीलामी व्ही है।

000

प्रदेश री सात विधानसभा सीटां माथे 13 नवम्बर ने होबा वाळां उपचुणाव खातर सगळी तैयारीयां पूरी करी जा रही है। न्यारा-न्यारा राजनैतिक दळां रा उम्मीदवार मतदातावां सूं मिल रह्या है। सलूम्बर विधानसभा उपचुनाव खातर **होम वोटिंग** प्रक्रिया काल सूं सुरू व्हेला। **जिला निर्वाचन अधिकारी अरविंद कुमार पोसवाल** बताया के होम वोटिंग प्रक्रिया रो पैलो फेर आठ नवम्बर ताई चालेला। बत्ती जाणकारी म्हाणा खबरनवीस सूं-

उपचुनाव वाळा हल्कां मांय अवैध चीजां लाबा ले जाबा माथे खास निगरानी राखी जा री है। टोंक जिला रा उनियारा मांय पुलिस अलीगढ़ हलकां सूं एक गाड़ी सूं आज चार लाख रिप्यां री नकदी जब्त करी।

000

जयपुर रा संस्थापक महाराजा सवाई जयसिंह द्वितीय री जयंती माथे आज उपमुख्यमंत्री दिया कुमारी स्टेच्यू सर्किल माथे वां री प्रतिमा माथे फूल चढाया। ईण मौके उपमुख्यमंत्री कह्या के जयपुर एक सोच-समझ र बणायो गयो बसावट वाळो शहर है। साफ-सफाई मांय यो देश रा तीन सब ऊं आगे आबा वाळां शहरां मांय शामिल कराबा खातर जनता री भागीदारी जरूरी है। वे कह्या के सगळा लोगां ने मिल र जयपुर ने सुन्दर अर साफ बणाणो चाहिजे। ईण मौके जयपुर हैरिटेज नगर निगम री महापौर कुसुम यादव भी मौजूद री। मुख्यमंत्री भजनलाल शर्मा भी महाराजा सवाई जयसिंह री जयंती माथे वां ने याद कर्या।

000

प्रदेश मांय व्ह्या दो न्यारा-न्यारा हादसा मांय दो टाबर समेत चार लोगां री मौत व्हे गयी। जालौर जिला रा भीनमाल मांय एक मकान मांय लागी आग मांय झुलस जाबा सूं दो टाबरां री मौत व्हे गयी। सूचना मिलबा माथे दमकल री मदद सूं आग ने काबू मांय कर्यो गयो। पहली निजर मांय आग लागबा रो कारण बिजली रो शार्ट सर्किट मान्यो जा रह्यो है। दूजो हादसो उदयपुर-बांसवाड़ा राजमार्ग माथे बीती देर रात माथे व्हयो। अठे चिड़ियावासा गांव रे कने एक कार बे काबू होर नदी मांय पड़ गयी। ईण सूं कार मांय संवार तीन मोट्यारा मांय सूं दो री मौत व्हे गयी। जद की एक जणो घायल व्हे गयो। कार मांय सवार तीन्यु मोट्यार दीवाळी माथे साबला सूं बांसवाड़ा शहर घूमबा खातर आया हा।

000

प्रदेश री बत्ती ठौड़ां माथे रात रा तापमान मांय गिरावट दर्ज करी जा रही है। ईण सूं सुवारे अर सिंज्या हल्की ठण्ड व्हेरी है, वठिने दिन मांय हाल भी गर्मी रो असर है। लारला चौबीस घंटां मांय सब ऊं बत्तो 38 दशमलव 2 डिग्री सेल्सियस तापमान जैसलमेर मांय दर्ज कर्यो गयो वठिने सब ऊं कम 14 दशमलव 2 डिग्री सेल्सियस तापमान संगरिया मांय दर्ज कर्यो गयो। मौसम केन्द्र जयपुर रे मुजब आवता एक हप्ताह मांय राज्य मांय मौसम सूखो रह सके है।

000